

欽  
定  
全  
唐  
文

欽定全唐文卷五百三目錄

權德輿 二十一

再從叔故試大理評事兼徐州蘄縣令府君墓誌

銘 并序

唐故使持節歙州諸軍事守歙州刺史賜緋魚袋

陸君墓誌銘 并序

使持節郴州諸軍事權知郴州刺史賜緋魚袋李

公墓誌銘 并序

唐故給事郎使持節房州諸軍事守房州刺史賜

緋魚袋崔公墓誌銘

并序

鄜坊節度使推官大理評事唐君墓誌銘

并序

太原府司錄事參軍李府君墓誌銘

并序

叔父故朝散郎華州司士參軍府君墓誌銘

并序

揚州兵曹參軍蕭府君墓誌銘

并序

洪州建昌縣丞崔公墓誌銘

并序

潤州丹陽縣丞盧君墓誌銘

并序

欽定全唐文卷五百三

權德輿 二十一

再從叔故試大理評事兼徐州蘄縣令府君墓誌

銘 并序

府君諱有方字某天水畧陽人也曾祖崇本皇朝散大夫  
滑州匡城縣令祖若訥皇右補闕起居郎桂歆梓三州刺  
史考做皇杭州紫溪縣令代以儒門四科爲家法故發於  
文則菁華施於政則惠醵公承是休德飾躬踐行得詩之  
無邪易之通理凡五授命皆以推擇曰左清道率府兵曹

參軍太子通事舍人陳州司法參軍亳州司士參軍以大  
理評事兼徐州蘄縣令滿歲南遊遘疾於途以貞元十六  
年夏五月歿於楚州之旅館春秋若干夫人河閒劉氏樂  
城公仁軌之元孫也明智才淑有子曰長懦弱冠舉進士  
甲科文行清修苴泉其容水漿不入以某年某月日得吉  
卜於某地其引也蓋殯也以輿師繁興未遑歸窆於東周  
之大隧姑刻圓石書其畧云公夷通直信睦嫻任卹位卑  
而志宏居約而家肥有爲有守不疲不跲其初命再命官  
衛贊謁雖未居真秩而四方之嘉招狎至其後掾二邦奉

六條受祿不誣實聞其政或攝領通邑或分乘輅車皆有  
裕人之仁急病之義及理於斲也能遂物之宜不奪人之  
時嘉惠善利洽於千室猶卽墨桐鄉之理無不及也又嘗  
饋師於回中從事於夷門皆有功利稱於其府其去斲也  
西方節將議委以謀猷介俟之重且謂弓旌之未稱也將  
以柱後惠文之冠招公章旣上而公大病斯可歎已猶子  
族子自期及總侍疾承訃奔波塗潦又以見公夙訓慈仁  
之所逮也噫嘻自匡城至公四代而三爲縣大夫皆用循  
政聞且以兩漢邴曼容陳仲弓爲準故不至豐祿加以梓

州之懿文盛德排抑於時道未光大終於郡節或者蕃祉  
必復其在後裔乎此宗門所以有望於公之孤之昌大也  
既而緘公理命命以論譔小子愀然涕洟而爲之銘曰  
恭惟叔父信厚清厲有車翹翹將事匪懈掾吏二部文而  
無害施化一同斬人以乂易象視履謂耆而艾奄然不淑  
力命相鑿楚挽虞殯風煙晦昧屬詞貞珉寧此厚載

唐故使持節歙州諸軍事守歙州刺史賜緋魚袋

陸君墓誌銘

并序

君諱修字公佐吳郡人曾祖某某官考某某官君早孤與

兄隱居於越有佳山水率子弟耕汲於其中日修桑門之法擯落人事貞元初兄既歿始爲宗姻士友所強慨然有應知己之心繇試左環衛歷大理評事攝監察御史裏行佐黔中又以殿中侍御史內供奉佐浙東凡四居憲職介二方伯皆有直聲休利邦人宜之十二年所從旣罷繼之者再至率以重禮禮君終不能屈非所樂而不苟合故也朝廷宗公賢大夫多悅其風十六年徵拜祠部員外郎居二年執事者上言其才請爲劇曹會東方守臣表二千石之缺天子方加恩元元循責吏理面命執事曰誠如是姑



使爲郡須其報政縻以好爵遂拜歙州刺史在途發瘍夏四月二十日卒於洛師享年五十五夫人河東柳氏殿中侍御史并之息女才淑有賢行長子某年在羈貫嗣子某未離襁抱夫人旣得卜吉且以孤藐之詞請表墓於父友故鄙夫泣書於寢門之外而不讓云君峻而通直而和羣而不黨至若流俗之齷齪細人之姑息屑屑汲汲之態不萌於胷中器度夷遠英華發外居常無怵迫臨事有風節同心定交造次以文評議鑒裁精明不惑從善親仁發於肺肝文章宏朗有作者風格學不爲人與古爲徒嚮使登

其年充其量束帶公朝其骨鯁魁壘之士歟常與故虔州  
刺史隴西李公受故右補闕安定梁寬中今禮部郎中京  
兆韋德符右補闕廣平劉茂宏祕書郎趙郡李叔翰方外  
士右諭德博陵崔公穎暨子友善噦夫相視莫逆行二十  
年洪範之攸好德儒行之遠相致今則已矣可勝慟也耶  
時貞元十八年歲直鶉首秋七月甲子鏤堅石而銘曰  
皦皦陸生中和粹清直如朱絃潔如白珩或默或語不將  
不迎如何斯人晻忽冥冥蚩蚩下輩戩穀或丁煜煜芳蘭  
嚴霜飄零命不可問死不可作嗚呼陸生

使持節郴州諸軍事權知郴州刺史賜緋魚袋李

公墓誌銘

并序

君諱伯康字士豐隴西成紀人自涼武昭王元孫文穆公  
冲爲元魏僕射司空與兄穆侯恭侯惠侯莊公中秉樞揆  
外顯方伯文穆公二子長曰廷實次曰休纂論道追命皆  
至司徒蟬聯茂盛冠於百族君卽叔氏司徒之後也曾祖  
仲進皇宣州司馬祖僑皇河南府澠池縣令父愔皇朝議  
大夫宗正丞贈濮州刺史三葉用晦仕不過郡佐縣令大  
夫典司宗籍而天爵崇茂士林嚮仰君以才實克家清方

入官始爲知己者所薦授閬州司倉掾轉下邳福昌奉先  
三縣尉皆有能名建中三年調補御史臺主簿成奏未下  
以太夫人寢疾歸侍藥膳明年丁內艱衣裳外除迫嚴君  
之命復調爲長安尉時王師清宮鑾輅初復武人干吏理  
轂下爲多事邑之細大必決於君每歲考績爲府中最貞  
元五年再集荼蓼終喪猶毀不交人事屏居池陽以耕植  
自業九年春西鄙不靖詔城五原以備邊廊坊節將選重  
賢佐以厚禮辟君實董塞門之役不愆於素抑有勞焉拜  
監察御史轉殿中丞賜以章紱尋遷侍御史加檢校工部

員外郎凡十四年徙官爲鄜上介伐謀而鄜之師以律折  
獄而鄜之人不寃十八年從守臣來朝行次中部所從復  
於左轂護其輶襃以至京師庀具會事稱情中禮十九年  
秋七月拜郴州刺史精力惠養蠲除煩苦導利省嗇而人  
不擾廉平信厚而吏知方今相國左丞鄭君頃移佐茲郡  
知君也熟洎入總綱轄盛推理行再筦宰政方圖陟明斯  
言未復奄忽彫落時永貞元年十月某日甲子春秋六十  
三悲夫君天資器幹機用強敏夷易疏通不移名聲學尚  
周給而緣情甚麗業履端修而睦婣尤甚時人多知君吏

理過於文行唯故相太傅盧恭公今相國左丞鄭君洎鄙人實知之而棲遲下國迫阨委化斯可歎已夫人范陽盧氏宣城縣令炅之女華緒令儀執笄佐餽先於君歿二十  
年矣嗣子盧氏縣尉操次子前明經掖支子某等皆以孝  
謹而承訓義君令弟長安主簿少安請急喪事奔波勤遠  
自荆抵洛泣奉輜車以元和元年某甲子葬於某縣某原  
之舊封君子曰於長安之兄之喪有以見同氣之痛德興  
以中外伯仲周知所履刻石紀事朴而不誣銘曰

柳之政兮理平君之行兮廉清矧有深知兮秉國之成亟

言於朝兮將陟其明窘然符守兮奄忽冥冥曾臆約結兮  
未攄平生道途自遠兮廣柳芻靈風雨所交兮卜洛佳城  
元龜是貞厚載是寧吁嗟乎內兄

唐故給事郎使持節房州諸軍事守房州刺史賜

緋魚袋崔公墓誌銘

并序

公諱述字元明博陵安平人自東漢長岑長濟北相代擅  
雕龍之美濟北五代至晉大司農宏司農八代至北齊右  
僕射昂僕射三代至公曾祖皇朝散大夫冀州武邑縣令  
諱紹大父同州白水縣尉諱頊烈考晉州汾西縣令贈定

州刺史諱昇之代有文行懿德爲北州冠族公夷雅溫粹  
安舒廉靜於座右銘得含元之妙於政論得理道之奧以  
之修身以之莅官蓋家法積厚而公能踐之之故也始自  
官衛試守未弱冠而爲藍田尉已有嘉聞尋轉婺州浦陽  
令揚州兵曹參軍皆以吏理著稱故辟書交委命書隨之  
歷監察御史殿中侍御史再爲侍御史實佐壽潭洪三邦  
車賦之重拊循輯睦繫上介是賴府遷於荆薦言於朝拜  
著作郎虞部員外郎論著奏議率循憲矩不毀方以求合  
不由徑以取捷貞元十二年出爲房州刺史承長帥剛嚴



之理當與師饋饗之殷暴征繼起煩言狎至而能推情厯身以裕勞人惻隱所被四封嘉靖十七年秋九月辛酉感疾捐館舍春秋五十七夫人京兆韋氏承公宮之訓爲女士之表凡合姓二紀柔而正勸以義之道備焉其孤文伯武伯等學通禮籍姿性純至斬焉相視泣奉裳帷以冬十一月甲子祔葬於東都某原禮也初公仲兄左庶子安平公有重名於時安平所與游者公皆從而游焉故常與賢士大夫推古今世道博約論辨攄之於詞凡數千言因曰勝質之文吾所甚懼彼奔馳塞路者旣不可遏又惡用斐

然之爲也耶遂輒削去其用晦如此行義醇備慈仁任卹  
安平旣卽世伯兄繼歿猶子之解巾結襦先於已子故不  
舉火之日男未仕女未行其於疾則十起衣無常主雖伯  
魚稚春不能加焉羣從族姻均祿直以賙其乏不結黨友  
不趨聲利常欲修性息跡考一邱之樂而未克齒與位皆  
負其實奄然不淑爲知者所歎建中初德輿遇公於九江  
之西其後辱安平戴侯之知於公獲南容之眷刻石志美  
不敢曼辭而實錄焉銘曰

齊稱大風漢有文宗雋賢歲難似續昭融坦坦房陵勞謙

孝恭優游祿仕惟道之從素履不華黃裳在中乃儀列星  
乃飾伏熊居易處厚有初有終魂氣杳冥諸孤哀恫圓著  
大蔡先遠攸同刻茲貞珉永賁邱封

鄜坊節度使推官大理評事唐君墓誌銘

并序

君諱款字嘉言北海人曾祖貞休皇比部郎中河南少尹  
祖詡太子洗馬考試河南府士曹參軍代有懿行遠承華  
構君清方敏厚幼有立志與伯氏文編講藝修詞知名於  
士友聞其文華浹洽而長於比興其義行潔修而篤於友  
悌貞元初舉進士甲科解巾補官衛紀綱掾右輔守臣撫

封辟士表爲支使轉左領軍倉曹明年復調爲左金吾曹  
曹因喟然曰吾三命不越於環列其道蹇歟滿歲宴居吟  
詠情性而已會故人彭城劉景通受天子推轂之重鎮於  
洛郡辟書旣至命書繼下以廷尉評事理軍訟未幾請急  
省兄於盛山又東南至於雲安閒關巴峽嬰冒霧露俄而  
景通入覲爲冬官司空方欲盛薦君於獻納侍從之列景  
通旣歿左右曹中執法多所引重而枕疾不起悲夫時二  
十年秋八月壬子其年四十有九昔崔駰管輅官不過長  
岑令少府丞而當時之翕然扇巧言進取滿志者可勝道

哉天閼紛綸從古所歎初娶馮翊嚴氏興元長帥相國太保公之女不幸早亡繼娶天水權氏華州司士參軍集之女子之從祖妹也有明識淑行爲六姻儀法結褵周月遭罹柏舟之痛遺允方娠可哀也哉予與文編周旋於文章道義二十年矣故辱君之歡亦舊淮湖睽阻京轍會合合姓怛化在旬歲之中寢門胥涕情何有極冬十月庚寅其孤輝旣得吉卜窆於萬年縣義善原且虞邱夷谷變不可以不識遂爲銘曰

一氣沄沄浮休滑湑英華未伸奄忽歸根于嗟乎嘉言于

嗟乎九原刻此清芬

太原府司錄事參軍李府君墓誌銘

并序

君諱雍字某趙郡鄆人曾祖萬安皇鄒平郡丞祖頊贈鄭  
州刺史父日知皇銀青光祿大夫黃門侍郎侍中戶工刑  
三部尚書君承蔭庥覆露而資性和厚有詞藻工篆隸起  
家太子通事舍人轉太常寺主簿年甫成童卓然有立志  
歷都水監丞長安丞轂下難理號爲稱職丁太夫人韋氏  
憂免喪猶毀不交人事尋詔除太原府錄事參軍已抱沈  
瘵以開元十有九年夏五月歿於長安昇道里享年三十

五噫嘻以侍中公之寬明正直忠孝於君親書在國籍爲  
景雲賢相宜其子孫昌阜有韋平之慶而義方積善所及  
不過於丞吏都吏未強仕而天斯命矣夫人范陽盧氏殿  
中侍御史敷之女司勳郎中游之妹華宗淑行先歿者二  
歲有子元之仕至晉州洪洞縣令愷悌之化行於鄉黨命  
屈其才亦不至大官洪洞之子曰鄧州新野令彬萬年尉  
彤陳州太康主簿彩太公廟丞彬前明經或等以吏以文  
循守家法君初嘗謂洪洞曰吾家代壤樹在周鄭之郊延  
陵羸博豈限故土苟吾啟手足必促擇不食之地而歸全

焉故君歿之歲秋八月權窆於萬年縣龍首原厥後七十  
有七歲彬彤等居內憂忍哀襄事因竭誠信循祖禰之志  
啟君之窆遷祔於京兆府奉先縣漫泉鄉保章里從考卜  
也與洪洞君庚甲分穴昭穆列次聿修之義情理無違而  
彤又狀其祖德請刻墓石抑予之重表甥也嘉其忠孝而  
銘之其辭曰

伊昔侍中實相睿宗以孝以忠穆然清風乃生良士博約  
仁義坦坦居易鬱湮下位家有孝孫卜茲鮮原刻勒清芬  
藏於墓門



叔父故朝散郎華州司士參軍府君墓誌銘

并序

洪範敘三德五福之道而德存乎人福繫乎運時未光大則卷而懷之姑以清行厚德遺諸子姓而已公諱隼字子鷺天水畧陽人十二代祖安邱敬公諱翼爲前秦司徒代有勲德以至四代祖平涼公諱文誕歷開府儀同三司涪常二州刺史曾祖滑州匡城縣令諱崇本王父益州成都縣令諱無侍烈考許州臨潁縣令諱伋初平涼之先三葉開國匡城以降世名文行公纘承茂緒祇服家法有大易之鳴謙中庸之慎獨慥慥其守孳孳其勤中立而不易方

夷道而不由徑故克家無玷干祿有聲天寶末州里舉經明屬幽陵叛渙計偕中止解巾試守河西尉真拜鄆陵丞時東郊不開違難逃祿艱貞潔白終出盜泉朝廷嘉之除楚州寶應丞是歲太夫人棄孝養刺血寫大乘微言毀瘠過禮既除喪爲親戚所勉調補宋州宋城縣丞孟尚書某方持郡節深相推重每歲考課居郡中最大厯中授福昌丞貞元初改華州司士嘗辟彭城劉公蕭國班公之府皆分事任實助經費所至之邦必聞其政所奉之主必加以禮而又學古不怠歌詩必類緣情而不流體要而無害故

祕書包公謂公內外循理心正氣和君子以爲知言其道  
未伸天奪之算嗚呼貞元九年四月辛亥終於富平從事  
之館享年六十一夫人陳郡殷氏皇曹州司法麗正殿學  
士踐猷之孫清河尉寅之女故給事中杭州刺史亮其兄  
也今侍御史郴州刺史永其弟也生德義之門襲猗那之  
慶自執筭主饋逮四十年孝慈柔明六姻是仰學備箴誦  
言成禮法公之祿甚薄而家甚肥中外無閒言諸孤猶已  
子閨門之內和樂薰如也旣茹未亡之痛護奉輶車東旋  
洛都八月癸丑遘疾癘終於新安之別墅享年若干有男

子五人長曰少成仕至桐廬尉次曰少清以經術甲科次  
曰某曰某皆以文學裕壘稟公之義方女子五人長適安  
福尉劉公範次適常州司倉齊暢其次未及笄皆稟夫人  
之明訓少成等曾未半歲再集茶蓼思養於下如不欲生  
銜恤忍哀竭其誠信以十月某日得吉卜於新安方山南  
龍澗原禮也小子齠歲而孤夙承善誘且懼徽音行實之  
不傳於後與陵谷之有遷也謹用論撰哀而不文銘曰  
惟叔父秉直清溫而文誠而明六試吏揚令名再從事有  
淑聲猗夫人懿純德倬婦行爲內則樂申申恭翼翼女有

家男述職天不傭降鞠凶道未行禍已鍾刻金石識邱封  
德不泯哀無窮

揚州兵曹參軍蕭府君墓誌銘

并序

君諱惟明字某南蘭陵人曾祖浚皇丹州刺史祖文遠皇  
睦州別駕考重暉皇金州別駕自丹州已降雖位不過守  
佐而皆以行義似續君卽別駕府君之元子也天寶中舉  
秀才數上行過乎謙竟不得居甲乙科時苟未至雖巧力  
無所措其用否不可久後累爲知己所薦自明州參軍事  
至揚州兵曹掾凡四更官皆有理效多以名聞薦拜或參

從事之列向非刃有餘而用無滯疇能及此晚歲病風家  
於丹陽葆真樂和樽酒自適輕財重義推誠於朋友之間  
不飾邊幅以曠達自任初君與令弟故司封郎中惟則同  
以儒服游京師賢士大夫締交慕義者如響郎中以通才  
厯職而君亦累爲名公所薦年位未至相次凋落嗚呼以  
建中二年四月某日所疾沈痼終於丹陽私第享年若干  
以某月日權窆於某所從宜也夫人扶風竇氏婦道柔明  
子渢渢汝等年未志學藐然無怙芻挽時行哀以求銘銘

曰

南齊之後福祉游臻厥生兵曹洵美且仁如何中路翳魄  
荆榛刻石窮泉永志聲塵

洪州建昌縣丞崔公墓誌銘

并序

君諱遴字某博陵安平人也六代祖北齊右僕射昂以文  
學正直周歷諸曹禮樂刑政所損益者十七八生隋水部  
司門二郎中洽有風儀器尚以世其家司門生皇掖縣令  
曇首掖縣生武邑令紹武邑生白水尉頊頊生汾西令贈  
定州刺史昇之自掖縣四世含德不耀君卽定州府君之  
長子故相國右庶子安平公其介弟也恬淡愿慤不遷於

時仁於鄉黨友於兄弟大厯中御史大夫贊皇李公之宣  
風於吳也聞其賢起家表薦爲常州武進縣尉跡徇知己  
心不近名俛視官曹非其好也建中初嗣曹王分闔案部  
於九江之西又以名聞轉洪州建昌縣丞君喟然曰莊生  
於陵子吾之師也惡用是哉終不屑就先築室於毘陵  
疏清流蔭碧蘚樹藝偃仰有終焉之志貞元十年正月日  
寢疾終於其家享年六十三夫人范陽盧氏華宗淑行動  
循禮法其孤景伯等年未及冠皆專經趣善藐然銜恤護  
奉輅車以明年十月某日歸祔於河南東原之舊塋先遠



故緩也季弟著作郎述貞諒遜悌稱於士林抱終鮮之痛主歸全之禮以德輿詳其素履俾爲墓銘銘曰

公綽之道澹無欲兮結身用晦言可復兮視履考祥宜哉穀兮乃如之人胡不淑兮周原舊封森拱木兮於以寧神識陵谷兮

潤州丹陽縣丞盧君墓誌銘

并序

君諱峴字某范陽人自魏已降官婚人物爲天下清甲大畧書於國史詳言在乎家牒今所書三葉自曾王父衛州司馬府君諱宏壽初貞晦不仕公車徵拜生冀州信都主

簿府君諱友裕友裕生揚州高郵縣令府君諱相君卽高  
郵之第若干子奉前人之業講先師之訓以之克家以之  
從政直方謙厚卑不可踰筮仕三次不離州縣之職曰毫  
州蒙城縣主簿楚州寶應縣尉潤州丹陽縣丞寬敬蒞事  
不希名譽故每當廉問薦延之日使臣陟明之舉皆遷延  
晦避時議多之清行懿名竟用不振以大厯九年七月日  
寢疾終於官舍享年五十五其嫠隴西李氏柔順有婦行  
嗣子某等決於著蔡銜恤襄事以關河不靖未克歸祔遂  
以某月日權厝於縣之北原焉從宜也予僑居丹陽嘗與

君游故麤書事實以備刻石銘曰

生死沍沍如環斯循吁嗟盧君於此歸根

欽定全唐文卷五百四目錄

權德輿 二十二

再從叔故京兆府咸陽縣丞府君墓誌銘 并序

長安主簿李君墓誌銘 并序

王妣夫人宏農楊氏祔葬墓誌銘 并序

獨孤氏亡女墓誌銘 并序

唐故相國右庶子崔公夫人河東縣君柳氏祔葬

墓誌銘 并序

唐故義武軍節度使支度營田易定觀察處置等

使檢校司空同中書門下平章事贈太傅上谷

郡王張公鄧國夫人谷氏墓誌銘

并序

衛國夫人李氏墓誌銘

并序

前京兆府咸陽縣丞權公故夫人清河張氏墓誌

銘

并序

朝議大夫洋州刺史王君夫人博陵縣君崔氏祔

葬墓誌銘

并序

湖州武康縣丞許君夫人京兆韋氏墓誌銘

并序

潤州丹陽縣尉李公夫人范陽盧氏墓誌銘

并序

洛陽尉何君夫人范陽盧氏墓誌銘

并序

唐睦州桐廬縣丞柳君故夫人天水權氏墓誌銘

并序

欽定全唐文卷五百四

權德輿 二十二

再從叔故京兆府咸陽縣丞府君墓誌銘

并序

府君諱達字某天水畧陽人曾祖崇本皇朝散大夫滑州  
匡城縣令祖若訥皇通議大夫桂歆梓三州刺史考僖皇  
深州安平縣令自十二代祖前秦安邱敬公至四代祖平  
涼公皆有勳力爲通侯大吏自匡城至安平以文采政事  
爲列城二千石家法休聲貽於後昆府君以士行吏理平  
端簡實大厯初調爲家令寺主簿厯同州馮翊縣尉河南

府登封主簿京兆府咸陽縣丞居之必聞考績得之必由  
綜覈中外之姻或據戚里都侈鄉未嘗巧從以去窮約且  
以枉道由徑食浮於人爲誠大率每十歲徙一官故歷三  
紀而四受祿勤官肅事不誘於長上循理蹈和不懼於健  
羨其有常歟其難進歟貞元十九年歲在癸未秋七月壬  
戌感風疾終於新昌里享年六十先是夫人南陽張氏明  
茂有禮法亦天奪其壽府君周纘旣除三月而鞠凶及悲  
夫支子塤等謀於族屬家老以明年春二月己酉祔真宅  
於萬年縣龍首原謹書官次以納幽窆銘曰



幽邱而下煜煜圭組宜昌鄜城仍代啟土平涼策勳梓州  
懿文家牒德風儀刑薦紳時惟叔父祇服丕矩始仕官卿  
乃從左輔周旋二畿坦坦安卑遵道而行不競於時修短  
奄忽兮嗚呼涕洟崇岡美楨兮永識於茲

長安主簿李君墓誌銘

并序

君諱少安字公和隴西成紀人自元魏僕射文穆公沖而  
下爲西州冠族或位不充者必以令德聞曾祖仲進皇宣  
州司馬祖僑河南府澠池縣令父愔朝議大夫宗正丞贈  
濮州刺史君卽濮州第三子敏信寬綽篤於行義方舉孝

廉偶爲所親者薦授冀州阜城縣尉旣非所好終不屑就  
王黔中礎之持節廉閭也表爲推官轉支使厯左武衛胄  
曹參軍大理評事用誠直贊佐夷落之人宜之府除至京  
師轉三原縣尉筦中書甲庫考績四居上第遷長安主簿  
二陵復土之重比歲會同輦轂之下儲峙無違典司廢置  
肅給安靜尹守以爲能方受代而復表留一歲御史府察  
視者數薦君自代君方勇於退故朝命未及焉元和三年  
三月乙酉感疾不起於長安興化里第享年五十君溫仁  
孝友喻義循理恢恢然有君子之度齒位皆屈而知者歎

焉夫人滎陽鄭氏太僕少卿叔規之女仁而不壽先是君  
元兄柳州刺史捐館舍請君襄事閒關勤遠閒一歲有嗒  
然之痛喪服甫除俄啟手足噫以積善之家而叢不淑如  
是糾纏之數其可問耶嗣子拭授等號奉輜車以夏五月  
景申祔於東都潁陽縣之某原禮也音徽永昧志義相倫  
情殷中外年同甲子濡涕操管銘於墓門銘曰  
族之盛兮才之令兮纔知命兮俄大病兮葬者藏兮潁之  
陽兮誌邱荒兮杳茫茫兮

王妣夫人宏農楊氏祔葬墓誌銘

并序

王妣夫人姓楊氏宏農人祖敏皇太僕少卿交州都督金鄉縣公父晏湖州武康縣令夫人始笄歸於王考府君府君名重而祿薄家肥而身約仕至左輔尉中兵紀綱掾所與遊者皆天下雋人賢士夫人無攸遂勸以義之道備焉天寶四年先太保貞孝公旣孤夫人慈仁訓育以文行紹續繇進士第授臨清尉薊縣尉安祿山之亂也以大節聞履險違難崎嶇色養滅跡人事以扁舟爲家至德二年夫人棄孝養於杭州富陽縣之行次時四方兵交歲大疫江東尤劇未克歸祔此焉寧神先公號眇崩毀因中風濕痺

痛一作瘡

外除拜御史著作郎皆以疾不祇命大厯丁未德

興丁茶蓼貞元戊辰再集艱棘餘生未泯積慶所鍾因緣踐履叨冒崇大以歲時之不易事物之多故久未遷神心焉若摧言陰陽者利在卯酉元和五年歲直庚寅德興忝太常卿以明年之吉襄事既具其年猥參宰政禮不克就乃建宗廟以嚴蒸嘗逮今十二歲在丁酉德興以檢校吏部尚書理戎漢中拜章上請協用龜策啟先公先太君壽堂於丹徒啟夫人壽宮於富陽得七月壬寅祔王考府君兆域於東都伊闕縣慈水之陽吉自杭抵洛凡二千五百

里水陸安靜誠信無違天之佑也惟尊靈幽閔周一甲子  
罪在孱菲宜當誅殛而懿範遺訓流光孕休閨門受祉施  
於孫子霜露怵惕如惓如醒又德輿之生也後不獲逮事  
逖聽令聞靡詳萬一故合姓之紀歲棄代之享年皆闕焉  
刻茲介石以永終吉銘曰

惟王母之令德淑明柔克閨門延耀以引以翼王父安卑  
兮其道未光先公大節兮易名章章伊孤孫之蒙駭不獲  
逮事慶靈流澤兮積累名器淝河湯湯輶車帷裳伊水之  
陽祔於幽堂萬有千歲兮徽音不忘

獨孤氏亡女墓誌銘

并序

元和十年歲在乙未冬十月二十一日戊午故祕書少監  
贈絳州刺史獨孤郁妻天水權氏寢疾終於京師光福里  
嗚呼吾之女也故哭而識之惟吾門代有懿德至先君太  
保貞孝公以大節大行爲人倫師表故鍾慶於爾而又天  
闕其成此吾所以不知夫天之所賦也初笄有行未嘗遠  
父母兄弟考室同里常如歸寧始絳州以褐衣納采其後  
爲侍臣史官更掌中外誥詔皆再命或三命十數年間便  
蕃清近烜赫光大天下公議以宰政待之其於閨門之內

佐君子供先祀嘻嘻申申有孝有仁乃者吾忝大任絳州  
居近侍而能婉約勞謙得六姻之和長信官受冊命之歲  
與母於內朝序位環佩之聲相聞黨族榮之人情禮意纖  
微矩度言內則者以爲折中噦夫絳州方強仕不淑爾又  
未練而歿年止三十一天之報施其何哉始稱未亡人也  
懼貽吾憂每斂感容而爲柔色然以沈哀攻中竟不能支  
悲夫初先舅憲公有重名於時絳州生而孤不得逮事儻  
冥冥有知將同穴而養於下耶抑智氣在上歸於合莫耶  
吾不知也生子二人女一人長男前一歲未成童而夭次



曰晦生十年矣至性過人未期再丁荼蓼噉號罔極晦世父右拾遺朗茹終鮮之痛撫之如不孤貞於龜策得明年六月六日壬寅祔葬於東都壽安縣之某原宜琢墓石以永於後吾老矣豈以文爲懼他人不知吾女之茂實故隱痛而銘曰

暘光未晝而湛晻兮植物方華以槁落兮懿吾女之淑令兮祔君子於冥漠已乎已乎吾不知夫神理之有無

唐故相國右庶子崔公夫人河東縣君柳氏祔葬

墓誌銘

并序

貞元十有一年歲在乙亥三月丁丑故相國安平公夫人  
河東縣君考終命於京師安仁里蓋春秋若干其孤曰懿  
伯號侍轉祔以十月庚午返祔於河南某原安平公之舊  
封禮也夫人姓柳氏代爲河汾右族齊周之際中書孝公  
虬司會景公慶以匪躬厚行爲北朝名臣孝公生止戈後  
周洛州刺史洛州孫皇海州長史憬憬生皇伊陽縣丞璿  
夫人之祖禰也夫人憑積厚之祉體柔嘉之姿旣笄歸於  
安平公公始以處士納采至於佩相印三十年閒內則彰  
聞嘗以命婦宜家疏封於本郡又以中宮恤禮爲位於內

朝齊明以助祭慈惠以厚下禴翟五采副笄六珈幽閒必聞於法度侈泰不萌於心術盛德發於身而被於族姻不可詳已始用和樂安於隱約終以淑均居於顯尊大君子之家肥道光其助宏矣旣嬰未亡之痛深惟出世之法受微言於順禪師以蓮華普門爲方寸津筏宜其永錫耆壽而爲大家今則已矣子壺不知夫命也懿伯爲左千牛備身純孝好學居喪得禮長女適宏農楊宏徵纔半歲有共姜柏舟之誓明識令行倫於古人幼女以衿褕來歸共承宗事故於夫人之道得周知之懿伯以陵谷之不可以不

識哀請論撰大凡以乾元元年合姓貞元二年受封安平公薨八年而夫人捐館其銘曰

於穆夫人徽柔淑溫儀於德門蹈履內則六姻是式藹然慈仁魚軒煌煌佩玉鏘鏘威儀申申居貧且樂處貴逾約其道可尊不享天年奄歸下泉孰司陶鈞哀此孝嗣熒然無恃訴於蒼旻東周故園宰樹鮮原裳帷翻翻紉於幽窆刻是貞石厥聲長存

唐故義武軍節度使支度營田易定觀察處置等使檢校司空同中書門下平章事贈太傅上谷

郡王張公鄧國夫人谷氏墓誌銘

并序

夫人姓谷氏魏郡昌樂人其先漢大司農永之後故義武軍節度檢校司空同中書門下平章事贈太傅上谷郡王張公之夫人也四代祖那律貞觀中仕至諫議大夫宏文館學士曾祖補袞左羽林軍長史祖倚相祕書省正字佐蘭錡以嚴禁旅詳魯魚以考祕文猶未充其才則延耀於後考崇義天寶末以雄畧氣敢從漁陽之師每建奇功亟摧北狄厯左武衛將軍左金吾衛大將軍累兼太僕殿中追贈特進懿是勲慶聚於夫人天資才明動合圖史早以

衿輦之誠宜於鐘鼎之門百兩以納采三月而助祭克洽中饋至於上公其於佐以純誠規以策畫超冠命婦之道叶贊守臣之勞者有焉建中元年疏賦於魏郡三年徙封於鄧國徽音法度列在命書貞元七年太傅薨於理所嗣子今義武軍節度易定等州觀察處置等使工部尚書易州刺史兼御史大夫延德郡王茂昭能業其勤載延其賞克家稟訓宣力撫封六官分職八命作牧虞潭榮養用厚人倫魯侯燕喜方期壽考伯仲有裕稱於北河曳裾於邸第者三持憲於牙門者一貞元十一年以幼子銀青光祿

大夫光祿少卿駙馬都尉茂宗既承築館之恩來俟執筭之慶方榮著代俄痛終堂以十二年二月丁卯寢疾歿於萬年縣安仁里享年四十九遺表以車服器用上獻王人就第申弔賜絹三百匹布一百端此又恩禮之有加也尚書以移孝在公遠竭誠信光祿以銜恤茹痛躬奉裳帷以其年冬十月甲戌得吉卜於京師少陵原不祔於太傅行古之道也生極井賦沒有寵賻恩備終始以榮以哀申命司言之臣採其淑行用琢琬玉銘於墓門銘曰

鵲巢之德夫人之職輔於上谷啟是鄧國淑慎溫惠徽柔

令色克大閨門施於燕翼萬鍾雖及九原俄卽賦命有涯  
孝思罔極

衛國夫人李氏墓誌銘

并序

夫人姓李氏趙郡人前相國司空今戶部尚書燕國于公  
之室也曾祖仲恩皇藍田縣尉祖琳河南府參軍考復司  
農丞三葉名器卑而婚親族類爲山東冠甲外曾王父裴  
丞相文獻公左右元宗爲時才臣外王父吏部郎中贈刑  
部尚書綜以文行著於清名舅族多賢與軒冕俱大中外  
積厚而生夫人興元元年燕公以南官郎冕而親迎其後



歷二千石九卿觀風貞師焯耀宏大三公相印六職地征  
勤勞輔佐淑慎和樂鵲巢之均一樛木之逮下采蘋之能  
循法度螽斯之子孫衆多實備有焉晉令公侯夫人銀印  
青綬佩水蒼玉貞元三年夫人以外命婦封河內縣君十  
九年以元侯內子進衛國夫人廣大專靜尚柔含德不言  
而徽音自遠不耀而儀型可象鍾郝之禮法爲而不有姬  
嬴之地望有而不恃於六姻之中薰然以仁煦然如春推  
心以及物各得其所欲故燕公琴瑟友之鐘鼓樂之克成  
婦順以贊家道元和十年冬十二月甲辰寢疾薨於安仁

里第享年若干不求醫禱以順性命雖知道之君子所難能焉明年春二月庚申祔先姑之塋於興平縣之某原禮也嗣子前太子左贊善大夫正祕書丞方某官季友某官某等永惟免於水火以至冠婚列在朝序率由慈蔭自惟堂至於遣奠哀敬有加燕公以德輿於外族爲表甥於中臺爲同列嗒然之痛俾誌斯文公又命方等泣狀往行始終詳實故如其論次繫之以銘銘曰

燕公之室宏是內則衛國攸宜淑明柔克環珮鏘然蒸嘗吉蠲家肥族睦二十二年如賓之敬循道之性不慮不圖

奄忽大病茂陵蒼蒼宰樹陰堂幽宅於茲兮德耀不忘

前京兆府咸陽縣丞權公故夫人清河張氏墓誌

銘  
并序

夫人姓張氏南陽人曾祖鉉皇正議大夫常州刺史祖重  
暉皇朝議大夫衡州刺史贈太常卿考伯禽皇銀青光祿  
大夫將作少監兼通事舍人弈代以大夫二千石班宣教  
化而先公贊謁在帝左右兄憑又以衛尉少卿簡王傳世  
其官故表儀風訓家法延耀夫人承是吉祿生而懿美大  
歷十二年旣筭歸於天水權公公時爲馮翊縣尉其後簿

登封贊咸陽徊翔於周秦甸圻間皆用功次得調滿歲食  
貧則嘻嘻於衡華之下族屬和而家事理抑夫人是賴資  
性溫重閨門整峻每中外六姻有嘉會喪禮必羞必赴周  
旋法度士女憲焉而不得鳴珰珮玉宏大中饋命也貞元  
十八年夏四月暴嬰疾癘終於京師新昌里春秋若干秋  
九月窆於某縣某原從吉筮也支子某等充窮技泣捧是  
圓石云不可以不識命從祖兄子銘之其詞曰

在漢七貂族之盛兮常山衡陽休有慶兮父兄仍代贊名  
命兮展彼夫人來合姓兮徽柔靜專家道正兮生也有涯

斯大病兮芻靈廣柳掩泉逕兮刻此貞珉彰淑令兮

朝議大夫洋州刺史王君夫人博陵縣君崔氏祔

葬墓誌銘

并序

夫人姓崔氏博陵安平人皇鳳閣侍郎平章事博陵郡王  
元暉之曾孫禮部侍郎璩之孫侍御史賁之息女洋州刺  
史瑯琊王君澄之嘉偶崔氏自漢濟北長岑代爲文宗王  
氏自晉睢陵卽邱繼生元臣二族之茂范蔚宗沈休文推  
本言之矣重以母后中宗之際石泉博陵二先正有經綸  
命代之材推戴格天之業延耀濟美爲祥爲祉爲君子爲

士女合姓好逑與他族不侔夫人未笄累失恃怙旁無兄  
弟泣血襄事奉二尊裳帷閒關道途自鍾陵抵洛邑哀敬  
與禮三者無違神祐純孝爲宗姻所歎某年從父兄縱盛  
選卿才故王君納采焉王君以才器政事連辟公府歷御  
史司直爲河南紀綱掾改陽翟令入爲尚書屯田郎出刺  
洋州柔嘉左右叶是休德初洋州同氣八人名位焯於當  
時冢婦介婦必華宗淑喆夫人贊宗事供先祀鼓瑟誦詩  
姿操閑雅奉上以誠羣居用和外言內言不越於閭朝服  
祭服必成於手洋州捐館二十年而夫人歿於櫟陽之別

聖時貞元十九年秋七月某甲子蓋年五十一初洋州娶  
滎陽鄭氏生子曰造而天夫人以繼室生子三人曰迺曰  
達曰邁母儀均養皆爲良士造仕至藍田尉迺修詞與計  
偕達邁咸以門資分佐環列哀號罔極泣問龜策以二十  
年冬十月某甲子祔於洋州之舊封先是洋州猶子興平  
尉源長受夫人之理命曰吾與爾二門積德奕代銘表必  
咨時文先舅之碑吏部趙郡李公實爲之先君之誌從翁  
太傅文貞公實爲之且以德興於夫人有通世之舊猥求  
論謨泣狀遺懿實而不華是用采獲以銘內則銘曰

安平臨沂右族蕃滋仁賢是儀好合嘻嘻乃封故地象服  
斯貴諒無攸遂亦勸以義婦順彰聞母儀可尊肅肅閨門  
四男晨昏吁嗟風樹奄闕泉路魯人之祔皇辟之墓鏤茲  
淑聲永識冥冥

湖州武康縣丞許君夫人京兆韋氏墓誌銘

并序

夫人姓韋氏京兆杜陵人楚傳漢相之後分封競爽以至  
周郎襄公孝寬爲宗門龜龍曾祖某某官祖某某官父楚  
器皇太子官門郎其外族隴西李氏涼武昭王元盛後魏  
司空文穆公沖隋絳郡公禮成之世德興之從母姊也中



外華閥乃生淑詰幼失恃怙先太君保而養之猶女子子焉旣笄歸於某郡許授授循理喻義調常州義興尉湖州武康丞滿歲葺田廬於霅溪之上忘懷進取夫人贊家道以供先祀誠伯宗而饁冀缺許君之動靜無悔抑有助焉所從之祿甚薄不及偕老徙宅教子宜家佐餽閨門之禮有同嚴君才識所及過人遠甚雖內外之言不越於閫而人事物理皆能折中焉凡結褵二十五歲而稱未亡人又十五歲而不舉火時元和二年正月某甲子春秋五十九其子士儉謹敏屬詩書未與計偕者不忍違養故也泣訪

著蔡得十月某甲子吉權祔於皇辟之封惟夫人有姿操  
徽範不得被魚軒翟茀之飾獨振內則而傳母儀孝子冢  
婦居喪率禮禮無違而哀有餘姻黨稱焉嗚呼孩提相長  
實均同氣今視士儉猶吾之出焉士儉緘哀詞理命請刻  
圓石骨涕直書寄茲沈痛銘曰

士之積行未必豐祿有美夫人不登象服從夫也有德有  
儀訓子也恩斯勤斯勸以義兮導之慈養未及兮命奪之  
服在總兮心若期刻琬玉兮流涕洟

潤州丹陽縣尉李公夫人范陽盧氏墓誌銘

并序

夫人姓盧氏范陽人北齊黃門侍郎思道之五代孫也曾  
祖悌皇高道不仕祖綱皇城門郎父侑皇太原縣尉雖仕  
皆數命以至淪謝而皆飾行懿文有當時之譽明德奕世  
誕生夫人既笄嬪於李公李公爲烏程丹陽二縣尉夫人  
居貧守約動必由禮謙敬以睦中外吉蠲以奉蒸嘗甘糲  
梁服澣濯中饋式敘和樂嘻嘻有嘉聞而無攸遂一紀於  
茲矣嘗聞善餘慶謙受益豈前志之謬歟將有必定之數  
歟旣而奄忽遘疾不翌日而大漸以大厯十一年月日歿  
於丹陽之私第享年若干以某月日權厝於縣西之五里

原從宜也生子數人早歲夭落今之存者女子三人長者  
生纔六霜其次差以幼矣雖禮所未及而號不絕聲呱呱  
然行路爲之憐戚公以爲鼓盆傷神兩不中節而鍾情之  
哀可勝旣乎且虞陵谷之變也乃命權氏甥德輿爲之銘  
曰

去夏屋之渠渠兮卽孤邱之栽栽往不可復兮沈痛如何  
薤露蒿里兮古有哀歌

洛陽縣尉何君夫人范陽盧氏墓誌銘

并序

夫人姓盧氏范陽人曾祖仁皇相州錄事參軍祖不勤皇

壽州霍山縣丞父隨皇太原府祁縣丞三世冲晦皆不至  
大官故夫人鍾其粹美生爲嬪則以旣笄之年歸廬江何  
君官至洛陽縣尉夫人有輔贊之美柔明之行誠順孝慈  
以內則爲師故得六姻之和而禮無違者乾元中何君早  
世夫人訓字諸孤動必以方長子士程爲蘇州嘉興尉幼  
子士乂儒行修明或吏或文克荷克構有女二人長適河  
東裴氏次適博陵崔氏皆奉母氏之訓宜其家室非導之  
教之至其及此歟以興元元年三月日考終命於嘉興  
年六十一士程士乂等謀及龜筮以某月日權厝潤州未

金史卷之二十一  
三  
克返葬故也夫人卽考功員外郎士幹之世母也予嘗接  
考功遊獲聞行實故不敢辭二孤之請刻石以銘之辭曰  
婉彼夫人淑明柔克周旋動用率由四德不辜蕃祉不躋  
壽域二連之哀哀何有極

唐睦州桐廬縣丞柳君故夫人天水權氏墓誌銘

并序

夫人姓權氏天水畧陽人十二代祖翼前秦僕射安邱敬  
公其後至周隋閒有佐命功代荷茅土者三葉以至曾王  
父滑州匡城縣令崇本王父益州成都縣尉無侍烈考許

州臨潁縣令伋成都以太學進士擢第臨潁判入甲科皆以文學著名粹行純氣有以鍾下夫人生而斂異姿性端明懿行全識發於天授而和敬以事長慈惠以拊下窈窕德象動成儀度機鑒精辨而深自晦默伯仲甥姪等每有疑理滯義多所諮訪夫人不得已而後言言必中倫誠順之道自中形外外內族姻之中瞻其儀型剛戾者順不仁者化以貞元二年三月歸河東柳君君爲睦州桐廬丞方謂有魚軒象服之慶享偕老宜家之壽不幸遘疾癘以其年七月日終於桐廬之官舍享年若干自設悅至於屬纊

九族無閒言終食無違德宜乎綏福履而介眉壽備祭服  
以參蘭館而迫阨終身莫申其道六姻安仰爲善者惑豈  
善慶昭報之言妄作耶將壽夭淹速之度固有所定耶柳  
君奉其喪以某月日權厝於丹陽縣某原竇氏伯娣之塋  
次從遺旨也從父兄子德輿一二羣從銜茹永痛書實錄  
於墓石銘曰

采蘋采蘋列於詩人恭惟淑明與古爲鄰嘉玉粹溫薜英  
葢藍淒風夜壑銷鑠堙淪命不可問兮從古汙汙追琢淑  
德兮用識幽墳